

circum perque duas in morem fluminis Arctos, 245
 Arctos Oceani metuentis aequore tingi.
 illic, ut perhibent, aut intempesta silet nox
 semper et obtenta densentur nocte tenebrae;
 aut redit a nobis Aurora diemque reducit,
 nosque ubi primus equis Oriens adflauit anhelis 250
 illic sera rubens accendit lumina Vesper.
 hinc tempestates dubio praediscere caelo
 possumus, hinc messisque diem tempusque serendi,
 et quando infidum remis impellere marmor
 conueniat, quando armatas deducere classis, 255
 aut tempestiuam siluis euertere pinum;
 nec frustra signorum obitus speculamur et ortus
 temporibusque parem diuersis quattuor annum.
 Frigidus agricolam si quando continet imber,
 multa, forent quae mox caelo properanda sereno, 260
 maturare datur: durum procudit arator
 uomeris obtunsi dentem, cauat arbore lintres,
 aut pecori signum aut numeros impressit aceruis.
 exacuunt alii uallos furcasque bicornis
 atque Amerina parant lentae retinacula uiti. 265
 nunc facilis rubea texatur fiscina uirga,
 nunc torrete igni fruges, nunc frangite saxo.
 quippe etiam festis quaedam exercere diebus
 fas et iura sinunt: riuos deducere nulla
 religio uetuit, segeti praetendere saepem, 270
 insidias auibus moliri, incendere uepres
 balantumque gregem fluuio mersare salubri.
 saepe oleo tardi costas agitator aselli
 uilibus aut onerat pomis, lapidemque reuertens
 incusum aut atrae massam picis urbe reportat. 275
 Ipsa dies alios alio dedit ordine luna